

rakyat Malaya sudah tentu tidak ada sebarang sekatan. Undang-undang ini meliputi semua bangsa yang bukan rakyat Malaya. Dalam pada itu ada pula syarat-syaratnya dan kecualinya, dan hal ini boleh mendapat keterangannya yang jelas daripada pejabat imigresen.

*

Mahu Meniru Gadis-gadis Moden

Che' Rosni, Kampung Perak Bukit Kuran Perak, bertanya: Dalam masa kecil saya bersekolah di kampung dan lazimnya saya bertudung kepala. Sekarang saya sudah menjadi guru penolong. Malangnya saya telah diejek-ejek oleh kawan-kawan perempuan sebaya saya kerana mereka tidak bertudung kepala dan rambut mereka pula sudah berkaren. Saya mahu meniru mereka tetapi ayah dan ibu saya melarang dengan berkata: "Dari masa kecil dididik secara anak Islam, sudah besar hendak meniru perbuatan Cina Serani." Saya sekarang serba salah dan kawan-kawan saya makin galak mengejek-ejek saya. Tolong terangkan apa hukumnya perempuan mendedahkan kepala mereka adakah berdosa perbuatannya?

Jawab: Jangan Che' Rosni meniru perbuatan yang dilarang keras oleh Islam itu. Di dalam Quran dan hadis dengan terang melarang perempuan mendedahkan auratnya dan itulah sebabnya perempuan-perempuan yang tahu hukum Islam menutup kepalanya kerana rambut perempuan ialah aurat yang mesti ditutup.

Kita puji ayah dan ibu Che' Rosni yang telah mendidik Che' Rosni dari kecil menurut adab ajaran Islam dalam soal pakaian, mudah-mudahan dalam soal amal (sembahyang, puasa dan seterusnya) serta tingkah laku (akhlak) demikian pula kerana itulah yang terutamanya.

*

Nabi Idris

A. Muhammad 'Alī Parit 15 Hutan Melintang Perak, bertanya: Nabi Idris pada masa ini sedang hidup di langit, adakah

apabila hari kiamat kelak ia akan mati atau tidak?

Jawab: Tidak ada keterangan yang sorih yang mengatakan bahawa Nabi Idris (A.S) telah diangkat ke langit. Ada tak ada Tuhan berfirman di dalam surah Maryam ayat 57 dan 58:

Wazkur fī al-kitābi Idrīsa innahū kāna siddiqannabiyya.

Warafa' nāhu makānan 'aliyyan.

Ertinya: "Ingatlah (perhatikanlah) kisah Idris di dalam Quran, sesungguhnya ia seorang yang amat benar dan menjadi nabi. Kami angkat dia ke atas tempat yang tinggi".

Setengah ahli tafsir mengatakan Nabi Idris telah diangkat ke langit dan ia sekarang masih hidup setelah dimatikan lebih dahulu. Tetapi setengah ahli tafsir yang lain mengatakan maksudnya Tuhan hanya mengangkat darjatnya bukan dirinya yang diangkat ke langit. Faham golongan yang akhir inilah yang lebih sesuai dan mudah diterima oleh akal.

////////////////////////////////////

Kerana cermat dan jimat

Belilah songkok yang diperbuat daripada baldu

“Crown Turkey”

Yang dijual oleh kedai-kedai penjual songkok di tempat tuan

Dipesan khas oleh

S.O. Bamadhaj

Singapore and Johore Bharu.

////////////////////////////////////